

Bazuar në nenin 35, paragrafi 1.1 të Ligjit nr. 03/L-209 për Bankën Qendrore të Republikës së Kosovës (Gazeta Zyrtare e Republikës së Kosovës, Nr. 77/16 Gusht 2010), si dhe Nenet 54 dhe 85 të Ligjit për Bankat, Institucionet Mikrofinanciare dhe Institucionet Financiare Jobankare (Gazeta Zyrtare e Republikës së Kosovës, nr. 11/11 maj 2012), Bordi i Bankës Qendrore të Republikës së Kosovës në mbledhjen e mbajtur më 09 nëntor 2012, miratoi si vijon:

RREGULLORE PËR AUDITIMIN E JASHTËM TË BANKAVE

Neni 1 Qëllimi dhe fushëveprimi

1. Qëllimi i kësaj rregulloreje është të forcojë kornizën rregullatorë, që ka të bëjë me auditorët e jashtëm të bankave dhe të përcaktojë kualitetin e shërbimeve të ofruara nga auditorët e jashtëm, në raport me rreziqet specifike të bankave dhe të sektorit financiar në përgjithësi. Kjo rregullore përcakton kërkesat për aprovimin e auditorëve të jashtëm, kryerjen e auditimit të jashtëm të bankave dhe marrëdhëniet ndërmjet auditorëve të jashtëm, bankave dhe BQK-së.
2. Kjo rregullore aplikohet për të gjitha bankat e licencuara nga BQK-ja për të operuar në Republikën e Kosovës.
3. Kjo rregullore aplikohet gjithashtu edhe për degët e bankave të huaja në rastet kur BQK-ja është e mendimit se kërkesat e paragrafit 4 të nenit 54 të Ligjit për bankat, institucionet mikrofinanciare dhe institucionet financiare jobankare janë përmbushur.

Neni 2 Përkufizimet

1. Të gjitha termet e përdorura në këtë Rregullore kanë kuptim të njëjtë siç janë përcaktuar në nenin 3 të Ligjit nr. 04/L-093 për bankat, institucionet mikrofinanciare dhe institucionet financiare jobankare (këtu e tutje: Ligji për bankat) dhe / ose siç përcaktohet më poshtë për qëllimin e kësaj Rregulloreje:
 - a. **Firmë auditimi** nënkupton një person juridik ose çfarëdo entiteti tjetër, pa marrë parasysh formën ligjore, që është e licencuar në përputhshmëri me Ligjin nr. 04/L-014 për kontabilitet, raportim financiar dhe auditim (Gazeta Zyrtare e Republikës së Kosovës, nr.11 / 26 gusht 2011) (këtu e tutje: Ligji për raportim financiar) për të kryer punët e auditimit.
 - b. **Auditor i jashtëm** nënkupton vetëm firmën e auditimit.
 - c. **Pasqyra financiare** nënkupton bilancin e gjendjes, pasqyrën e të ardhurave, pasqyrën e rrjedhës së parasë, pasqyrën e ndryshimeve në ekuitet, shënimet plotësuese dhe materialet sqaruese, që janë pjesë përbërëse e pasqyrave financiare.

Neni 3

Kushtet e përgjithshme

1. Auditori i jashtëm i një banke të licencuar nga BQK-ja për të operuar në Kosovë duhet të aprovohet nga BQK-ja.
2. Bazuar në aplikacionin me shkrim, BQK-ja do të aprovojë si auditor të jashtëm të një banke vetëm:
 - a) Një auditor të jashtëm të licencuar në Kosovë në pajtim me Ligjin për raportim financiar.
 - b) Një auditor të jashtëm që ka së paku 3 (tre) vjet eksperiencë në, fushën e auditimit të pasqyrave financiare të bankave apo institucioneve të tjera financiare apo stafi pjesëmarrës i të cilit kryen auditimin të ketë një eksperiencë të tillë.

Neni 4

Kushtet specifike dhe kërkesat

1. Aprovimi që i jepet auditorit të jashtëm është i kufizuar për një bankë specifike dhe është i vlefshëm për një vit financiar.
2. Aplikacionet për aprovim duhet të dorëzohen në BQK para datës 30 qershor të secilit vit.
3. Banka, së bashku me aplikacionin për aprovim, duhet t'i sigurojë BQK-së:
 - a) Propozimin e komitetit të auditimit dhe bordit të drejtorëve ose të organit përkatës të bankës mëmë në rastin e degës së bankës së huaj, për emërimin e auditorit të jashtëm;
 - b) Programin e auditimit të bankës;
 - c) Përshkrimin e shfrytëzimit të burimeve gjatë shërbimit të auditimit;
 - d) Letrën e angazhimit të auditorit të jashtëm ose kontratën e shërbimit të ofruar;
 - e) Dokumentin që vërteton përvojën e mjaftueshme të auditorit të jashtëm apo të stafit të tij i cili kryen auditimin në fushën e auditimit të bankave apo institucioneve të tjera financiare;
 - f) Vërtetimin e lëshuar nga Këshilli Kosovar për Raportim Financiar (KKRF) në lidhje me rezultatet e kontrollit të fundit të cilësisë për auditorin e jashtëm (ky vërtetim nuk do të kërkohet nga BQK-ja derisa KKRF të mund të lëshojë një vërtetim të tillë); dhe
 - g) Deklaratën me shkrim të auditorit të jashtëm mbi përmbushjen e kritereve të përcaktuara në nenin 7 të kësaj Rregulloreje.
4. Programi i auditimit dhe shfrytëzimi i burimeve gjatë shërbimit të auditimit, duhet të jetë i përshtatshëm në raport me karakterin dhe madhësinë e bankës.
5. Punësimi i vazhdueshëm i auditorit të jashtëm të njëjtë është i kufizuar në tre vite apo tre auditime të njëpasnjëshme.

Neni 5

Reputacioni i mirë

BQK-ja do të aprovojë si auditor të jashtëm të një banke, auditorët e jashtëm që kanë reputacion të mirë dhe të cilët nuk janë të angazhuar në asnjë aktivitet, i cili është në mos përputhshmëri me funksionet e auditimit të jashtëm.

Neni 6

Ribërja e auditimit

BQK-ja ka të drejtë të kërkojë ribërjen e auditimit nga një tjetër auditor i jashtëm me shpenzimet e bankës, në rastet kur auditori i jashtëm ekzistues i bankës e ka kryer auditimin ose ka paraqitur një raport, i cili nuk është në përputhje me kërkesat e Ligjit për bankat, Rregulloret e BQK-së, Standardet Ndërkombëtare të Auditimit (SNA) dhe nuk shpreh gjendjen financiare të vërtetë dhe të saktë të bankës.

Neni 7

Etika profesionale

Auditorët e jashtëm duhet t'i nënshtrohen parimeve të etikës profesionale të përcaktuara nga Federata Ndërkombëtare e Kontabilistëve "Kodi i etikës për Kontabilistët Profesional".

Neni 8

Pavarësia dhe objektiviteti

1. Gjatë kryerjes së auditimit, auditorët e jashtëm duhet të jenë të pavarur nga entiteti që auditohet dhe në asnjë mënyrë nuk duhet të përfshihen në vendimet e menaxhmentit të bankës që auditohet. Auditorët e jashtëm nuk duhet të kryejnë auditimin, nëse ekziston ndonjë marrëdhënie direkte apo indirekte financiare, pune, punësimi apo çfarëdo marrëdhënie tjetër, përfshirë edhe provizionin për shërbimet joaudituese shtesë, ndërmjet auditorëve të jashtëm dhe bankës që auditohet, nga e cila një palë e tretë objektive e arsyeshme dhe e informuar do të mund të konkludonte se pavarësia e auditorëve të jashtëm është kompromentuar.

2. Auditorët e jashtëm të aprovuar, gjithashtu duhet të jenë në pajtim me dispozitat e Rekomandimit të Komisionit të Bashkimit Evropian (BE) të 16 maj-it 2002 mbi Pavarësinë Statutore të Auditorëve në BE: Struktura e Parimeve Fundamentale. Për më tepër, BQK-ja do të sigurojë pajtueshmëri me Kapitullin IV të Direktivës së BE 2006/43 mbi auditimet statusore të llogarive vjetore dhe llogarive të konsoliduara.

3. Auditorët e jashtëm duhet të dokumentojnë në letrat e punës së auditimit, të gjitha kërcënimet e pavarësisë së tyre si dhe masat e sigurisë që i kanë ndërmarrë për zbutjen e atyre kërcënimeve.

Neni 9

Pavarësia dhe objektiviteti i auditorëve të cilët kryejnë një auditim në emër të firmave audituese

Pronarët apo aksionarët e një firme audituese të aprovuar, gjithashtu edhe anëtarët e organeve administrative, menaxhuese dhe mbikëqyrëse të asaj firme, apo të një firme të asociuar, nuk duhet të ndërhyjnë në ekzekutimin e ndonjë auditimi në çfarëdo mënyre që do të rrezikonte pavarësinë dhe objektivitetin e auditorit, i cili kryen auditimin në emër të firmës audituese.

Neni 10 **Tarifat e auditimit**

1. Tarifat e shërbimeve të auditimit:

- a) Duhet të jenë adekuate që të mundësojnë kualitetin e duhur të auditimit;
- b) Nuk duhet të jenë të influencuara apo të përcaktuara nga provizioni i shërbimeve plotësuese të bankës që auditohet; dhe
- c) Nuk mund të bazohen në asnjë formë të kushtëzimit.

Neni 11 **Kërkesat ndaj auditorëve të jashtëm në kryerjen e auditimit të llogarive vjetore**

Auditorët e jashtëm duhet të kryejnë të gjitha auditimet e bankave në pajtim me SNA.

Neni 12 **Përmbajtja e auditimit**

1. Auditorët e jashtëm duhet të vlerësojnë nëse llogaritë vjetore të bankës janë apo nuk janë përgatitur dhe finalizuar në pajtim me Standardet Ndërkombëtare për Raportim Financiar (SNRF), me Ligjin për bankat dhe Rregulloret e BQK-së, si dhe të vlerësojnë nëse menaxhmenti i bankës e ka plotësuar apo jo obligimin e tij për të siguruar shënime të qarta dhe të duhura, si dhe dokumentimin e informatave kontabël në pajtim me Ligjin për bankat dhe Rregulloret e BQK-së.

2. Auditorët e jashtëm duhet të vlerësojnë nëse informatat në raportet vjetore lidhur me llogaritë vjetore, supozimet lidhur me vazhdimësinë e operacioneve dhe propozimet në lidhje me shfrytëzimin e tepricave apo mbulimin e humbjeve janë në pajtim me Ligjin për bankat dhe Rregulloret e BQK-së dhe nëse informata është në pajtim me llogaritë vjetore.

3. Auditorët e jashtëm duhet të vlerësojnë mjaftueshmërinë e sistemeve të administrimit të rreziqeve të bankës, duke u bazuar në vlerësimin e:

- a) Përputhshmërisë me kërkesat për strukturat organizative në lidhje me administrimin e çdo rreziku specifik;
- b) Politikave dhe procedurave për administrimin e çdo rreziku specifik si dhe të zbatimit të tyre;
- c) Mjaftueshmërisë së identifikimit, matjes dhe monitorimit të çdo rreziku specifik;
- d) Mjaftueshmërisë dhe efikasitetit të sistemit të auditimit të brendshëm në lidhje me administrimin e çdo rreziku specifik.

4. Rreziqet specifike përfshijnë: rrezikun kreditor, rrezikun e tregut, rrezikun operacional, rrezikun e likuiditetit dhe rreziqet e tjera ndaj të cilave bankat ekspozohen.

5. Auditorët e jashtëm duhet të kryejnë një vlerësim për bankat lidhur me mënyrën e menaxhimit të mjeteve dhe vendosjen e kontrolleve të brendshme të duhura.

6. Auditimi i bankave duhet të mbulojë fusha të tilla si të portfolit kreditor, rezervave për humbjet nga kreditë, mjeteve jopërfomuese, vlerësimin të mjeteve, tregimit dhe aktiviteteve të tjera të letrave me vlerë, derivativave, sekjuritizimit të mjeteve dhe mjaftueshmërisë së kontrolleve të brendshme mbi raportimin financiar.

7. Auditorët e jashtëm duhet që nëpërmes auditimeve, të kontribuojnë në parandalimin dhe shpалosjen e parregullsive dhe gabimeve.

Neni 13

Detyrat e auditorëve të jashtëm

1. Auditorët e jashtëm duhet të kryejnë auditimet sipas gjykimit të tyre më të mirë përfshirë vlerësimin e rrezikut, që paraqet përfshirja e informatave të gabuara në llogaritë vjetore për shkak të parregullsive dhe gabimeve.

2. Auditorët e jashtëm duhet të sigurojnë se kanë bazë të mjaftueshme për të vlerësuar nëse është bërë ndonjë shkelje e Ligjit për bankat dhe Rregulloret e BQK-së, të cilat janë materiale sa i përket llogarive vjetore.

3. Auditorët e jashtëm duhet të kontrollojnë rregullshmërinë, saktësinë dhe plotësinë e raportimeve të bankave të paraqitura në BQK, në përputhje me kërkesat rregulative në fuqi të miratuara nga BQK-ja. Bazuar në kontrollin e ushtruar auditorët e jashtëm duhet të vlerësojnë, nëse raportimet janë kryer ose janë në përputhje me Ligjin për bankat dhe Rregulloret e BQK-së dhe nëse ato pasqyrojnë në mënyrë realiste dhe objektive gjendjen financiare të bankës.

4. Auditorët e jashtëm duhet t'ia paraqesin me shkrim bordit të drejtorëve të bankave rrethanat e poshtëshënuara:

- a) Mangësitë në lidhje me detyrimin për të siguruar regjistrimin e duhur, shpалosjen e qartë dhe dokumentimin e informatave kontabël;
- b) Gabimet dhe mangësitë në organizimin dhe kontrollin e menaxhimit të mjeteve;
- c) Parregullsitë dhe gabimet që mund të shkaktojnë informim të gabuar në llogaritë vjetore;
- d) Rrethanat që mund të shkaktojnë detyrime të anëtarëve të bordit të drejtorëve, asamblesë së përgjithshme të aksionarëve apo menaxhmentit të lartë.

Neni 14

Dokumentimi i kryerjes së detyrës

Ashtu siç kërkohet me SNA 230, "Dokumentimi i Auditimit", auditorët e jashtëm duhet të dokumentojnë sesi është kryer një auditim si dhe rezultatet e një auditimi. Çështjet të cilat tregojnë se parregullsitë ose gabimet mund të jenë të pranishme, duhet të dokumentohen në mënyrë të veçantë.

Neni 15

Mirëmbajtja e letrave të punës së auditimit

Letrat e punës së auditimit duhet të përgatiten dhe mirëmbahen në pajtim me SNA përkatës.

Neni 16

Raporti i auditorëve të jashtëm

1. Auditorët e jashtëm duhet të përgatisin një raport vjetor të auditimit me një opinion të auditimit në pajtim me SNRF dhe në rast të paraqitjes së diferencave materiale, gjithashtu edhe një raport të auditimit me një opinion të auditimit në pajtim me Rregulloren e BQK-së mbi menaxhimin e rrezikut kreditor.

2. Raporti i auditimit duhet të konfirmojë që shërbimet e auditimit janë kryer në pajtim me dispozitat e Ligjit për banka, kësaj Rregulloreje dhe rregulloreve të tjera relevante të BQK-së.

3. Raporti i auditimit duhet të verifikojë dhe shpalos çështjet në vijim:

- a) Nëse llogaritë vjetore janë përgatitur dhe finalizuar në pajtim me SNRF, Ligjin për bankat dhe rregulloret përkatëse të BQK-së dhe paraqesin një pamje të drejtë dhe të vërtetë të gjendjes financiare dhe aktiviteteve të bankës;
- b) Nëse menaxhmenti i bankës e ka përmbushur obligimin e tij, për të siguruar shënime të qarta dhe të duhura si dhe dokumentimin e informatave kontabël; dhe
- c) Nëse informatat në raportin vjetor në lidhje me llogaritë vjetore, supozimet lidhur me vazhdimësinë e operacioneve dhe propozimet në lidhje me shfrytëzimin e tepricave apo mbulimin e humbjeve janë në pajtim me Ligjin për bankat dhe rregulloret përkatëse të BQK-së dhe nëse informata është në pajtim me llogaritë vjetore.

4. Nëse llogaritë nuk japin informata lidhur me rezultatin dhe gjendjen e bankës, e që duhet të sigurohen, auditorët e jashtëm duhet të theksojnë këtë ose të përcaktojnë opinionin e rezervuar të auditorëve dhe mundësisht të sigurojnë edhe informata të nevojshme plotësuese në raportin e auditimit.

5. Nëse auditorët e jashtëm arrijnë në përfundim se llogaritë nuk duhet të përfundohen në formën e tyre aktuale, kjo duhet të theksohet në mënyrë të qartë.

6. Nëse auditorët e jashtëm, gjatë kryerjes së auditimit, zbulojnë rrethanat që mund të shkaktojnë detyrime të anëtarëve të bordit të drejtorëve, asamblesë së përgjithshme të aksionarëve apo menaxhmentit të lartë, kjo duhet të paraqitet në raportin e auditimit. Auditorët e jashtëm, gjithashtu duhet të ofrojnë informata të tjera në lidhje me rrethanat, për të cilat besojnë se duhet njoftuar pjesëmarrësit apo aksionarët e bankës.

7. Auditorët e jashtëm duhet të vlerësojnë zbatimin e rekomandimeve të dhëna nga auditorët e jashtëm për vitin e kaluar financiar.

8. Auditorët e jashtëm, të cilët auditojnë llogaritë vjetore të kompanisë amë të bankës, duhet të përgatitin raport të veçantë të auditimit për grupin siç kërkohet me SNA. Dispozitat e paragrafit 1 deri në 7 të këtij neni, aplikohen njëjtë në raportin e auditimit të grupit.

Neni 17

Letra e menaxhmentit

1. Auditorët e jashtëm, duhet që në pajtim me Ligjin për bankat dhe rregulloret përkatëse të BQK-së, të përgatitin letrën finale të menaxhmentit për bankën, për konkludimet e procesit të auditimit. Letra e menaxhmentit duhet të përfshijë të gjitha konkluzionet në të cilat mund të ketë arritur auditori i jashtëm në lidhje me aktivitetin apo gjendjen financiare të bankës, si dhe informatat në lidhje me kujdesin e tyre në mision të auditimit.

2. Në letrën finale të menaxhmentit, auditorët e jashtëm duhet të japin një deklaratë specifike në lidhje me sistemin e kontroleve të brendshme me qëllim që të japin siguri specifike mbi dhe për qëllim të shpalosjes së çështjeve materiale në strukturën e kontrollit të brendshëm. Deklarata specifike, gjithashtu duhet të përfshijë funksionin e auditimit të brendshëm.

Neni 18

Fshehtësia

1. Auditorët e jashtëm dhe bashkëpunëtorët e auditorëve të jashtëm, kanë për detyrë të ruajnë fshehtësitë sa i përket çfarëdo njohurie të përfituar gjatë kohës së aktiviteteve të tyre, përveç nëse me ligj përcaktohet ndryshe apo në rastet kur informata ka të bëjë me personin detyra e të cilit nuk kërkon fshehtësinë profesionale. Auditorët e jashtëm dhe bashkëpunëtorët e auditorëve të jashtëm nuk mund t'i shfrytëzojnë ato informata për aktivitetet e veta, për shërbim apo punësim të tjerëve.

2. Auditorët e jashtëm, pa marrë parasysh kufizimet e paraqitura në paragrafin 1 të këtij neni apo të marrëveshjes për fshehtësi, mund të japin shpjegime dhe paraqesin dokumentacionin rreth auditimit të kryer, në rastet kur kërkohet me legjislacionin në fuqi në Kosovë.

3. Detyrimi i mbajtjes së fshehtësisë vazhdon të zbatohet edhe pasi të ketë përfunduar detyra e tillë.

Neni 19

Obligimi për të informuar

1. Auditori i jashtëm brenda kornizave të detyrës së tij duhet të ofrojë informata në lidhje me çështjet që kanë të bëjnë me bankën, të cilat auditori i jashtëm i ka mësuar gjatë kohës së auditimit, kur kjo kërkohet nga mbledhja e përgjithshme e aksionarëve, bordi i drejtorëve, menaxhmenti i lartë, komiteti i auditimit apo nga një person i autorizuar nga BQK-ja.

2. Auditori i jashtëm, duhet menjëherë t'i komunikojë komitetit të auditimit apo bordit të drejtorëve të bankës, ndonjë çështje me interes për qeverisje, të cilën e ka vërejtur gjatë kryerjes së auditimit. Auditori i jashtëm, duhet menjëherë të njoftojë organet drejtuese të bankës dhe BQK-në, në rastet kur gjatë kryerjes së auditimit të bankës, ai vëren:

- a) Informatën që shfaq shenja të dështimit në përmbushjen e kërkesave për licencim nga ana e BQK-së;
- b) Një konflikt serioz brenda organeve vendimmarrëse apo largimin e papritur të menaxherit që ka pasur funksion kyç;

- c) Informatën e cila tregon se mund të ketë shkelje materiale të ligjeve, rregulloreve, udhëzimeve dhe urdhrave të BQK-së, si dhe statutit dhe të akteve nënligjore të bankës; ose
- d) Synimin e auditorit të brendshëm për të dhënë dorëheqje apo largimin e tij dhe ndryshimet negative apo materiale që paraqesin rrezik për punën e bankës dhe mundësinë që rreziku të vazhdojë.

3. Auditori e jashtëm, duhet që në bazë të kërkesës së BQK-së, t'i ofrojnë BQK-së çfarëdo informate gjatë tërë misionit të auditimit, në lidhje me performancën e tij në shërbimet e auditimit të një banke.

4. BQK-ja mban kontakte të rregullta dhe mund të iniciojë takime me auditorin e jashtëm të bankave në çdo kohë kur kontaktet e tilla konsiderohen të nevojshme.

Neni 20

Kontrolli i cilësisë dhe rishikimi tij

1. Auditorët e jashtëm të aprovuar nga BQK-ja duhet të aplikojnë politikat dhe procedurat adekuate të kontrollit të cilësisë të cilat i adresojnë të gjitha aspektet e rëndësishme të auditimit.

2. Auditorët e jashtëm të aprovuar nga BQK-ja, do të jenë subjekt i një rishikimi të cilësisë së dhënies së sigurisë, nga ana e BQK-së.

3. Rishikimi i cilësisë të një auditori të jashtëm të aprovuar, duhet të përfshijë një detyrë specifike të auditimit dhe duhet të kryhet nga ana e BQK-së apo nga ana e një rishikuesi të caktuar nga BQK-ja.

4. Gjatë rishikimit të cilësisë, BQK-ja apo rishikuesi duhet të përcaktojë se deri në çfarë mase, auditori i jashtëm i ka aplikuar rregullat dhe procedurat adekuate të kontrollit të cilësisë, në të gjitha aspektet e rëndësishme të auditimit. Gjatë rishikimit, BQK-ja apo rishikuesi duhet të ketë qasje në të gjitha dokumentet e punës së auditorit të jashtëm deri në atë masë, që është e nevojshme për të kryer një kontroll adekuat të cilësisë.

5. Duke pasur parasysh obligimet për ruajtjen e fshehtësisë, neni 18 i kësaj Rregulloreje aplikohet njëjtë si për BQK-në ashtu edhe për rishikuesin.

6. Rezultatet e përmbledhura të rishikimit të cilësisë së dhënies së sigurisë do të publikohen nga BQK-ja, duke përfshirë rekomandimet, zbatimin e rekomandimeve dhe nëse ndodh ndonjë rast edhe sanksionet.

Neni 21

Shkarkimi dhe dorëheqja

1. Auditorët e jashtëm të bankave mund të shkarkohen vetëm kur ekzistojnë baza të mjaftueshme për këtë. Dallimet e opinioneve të trajtimeve në kontabilitet ose në procedura të auditimit, nuk mund të konsiderohet si bazë e mjaftueshme për shkarkim.

2. Si bankat e audituara ashtu edhe auditorët e jashtëm, duhet të informojnë BQK-në në rast të shkarkimit apo të dorëheqjes dhe duhet të japin shpjegime të mjaftueshme për arsyet e një vendimi të tillë.

Neni 22

Tërheqja e aprovimit

Aprovimi i auditorit të jashtëm do të tërhiqet nëse reputacioni i mirë i asaj firme audituese është kompromentuar seriozisht apo nëse njëri nga kërkesat e kësaj Rregulloreje nuk përmbushet më.

Neni 23

Zbatimi, masat përmirësuese dhe dënimet civile

1. Nëse auditorët e jashtëm të bankave shkelin detyrat e auditorit, të përcaktuara me Ligjin për bankat, këtë rregullore dhe rregulloret tjera përkatëse të BQK-së, BQK-ja mund t'i shqiptojë auditorit të jashtëm një vërejtje me shkrim, një kopje e së cilës do t'i dërgohet bankës së audituar.

2. Nëse shkeljet e përshkruara në paragrafin 1 të këtij neni përsëriten, BQK-ja ka të drejtë të refuzojë aprovimin e auditorit të jashtëm për t'u angazhuar në kryerjen e auditimit të institucioneve financiare të licencuara nga BQK-ja, për të operuar në Republikën e Kosovës apo të ndërmarrë masat e parashikuara me paragrafin 3 të nenit 54 të Ligjit për bankat.

3. BQK-ja mund të vendosë Dënimet Civile në pajtueshmëri me paragrafin 3 të nenit 82 të Ligjit për bankat.

Neni 24

Shfuqizimi

Pas hyrjes në fuqi të kësaj rregulloreje, shfuqizohet Rregulla e amendamentuar për auditimin e jashtëm dhe auditorët e jashtëm të institucioneve financiare e aprovuar më 18 shkurt, 2008 dhe çdo dispozitë tjetër që mund të jetë në kundërshtim me këtë rregullore.

Neni 25

Hyrja në fuqi

Kjo Rregullore hyn në fuqi me datë 03 dhjetor 2012.

Kryetari i Bordit të Bankës Qendrore të Republikës së Kosovës

Gazmend Luboteni